



男人最溫柔个名仔

「若爸最無用，你兜姊妹嫁忒幾久咧，佢一打開間門，就目汁漕流。」聽著這個話，佢也盡無用，目珠眶眊等紅起來。佢知，佢姆講這個話，也係表示佢心肝肚个捨毋得。毋過，佢一溜較堅強，罕得看佢流目汁，毋像佢爸，對細人仔總係有一隻最軟、最毋盼得个心。

佢還細个時節，佢姆一日到暗就無閒直掣，像極樂仔樣轉無停，毋係洗衫、煮飯，就係掌店、渡人。因為降(giungˋ)著多，佢較無時間好哀奶佢這隻座最大个妹仔，佢逐日就目勾勾仔希望阿爸煞煞下班陪佢。佢最愛聽佢講古咧，雖然佢講來講去就係一條安到「金獅狗撈金獅貓」个古，也共樣用「你知狗仰會恁惱貓仔無？」來起榼，佢還係擘等金金个目珠，用期待个眼光，聽阿爸一遍又一遍講下去。尤其在該北風呼呼滾響，冷到奈毋得个冷天，兩子爺罔在被竇，一儕耐心講、一儕專心聽，該種个溫暖、幸福、滿足，到這下想起來，嘴丫角還會慢慢仔弛起來。

「毋好緊停動哦！啄目睡咧係無？」這時佢毋係伏在阿爸个膝頭頂分佢操耳空，就係伸出細細个手分佢剪手指甲。阿爸个輕手輕腳、細心細意、低言細語，就像一陣一陣柔柔个春風吹過，分佢舒服到目珠強強會眨落去。一般人屋下係「嚴父慈母」，佢屋下相反，係「慈父嚴母」，佢姆个信條係「細人仔細細毋搵(vud)，大咧斯搵毋直咧。」所以一直嚴條教子。佢爸認為「嚴官出惡賊」，打罵毋係好个教子方法，佢總係撈細人仔像寶貝樣捧到手巴掌，分佢兜最多个關心疼痛惜。

一溜里來，佢爸對人就盡好性，尤其對佢兜子女。佢毋識看佢對細人仔大聲細聲，也毋識看著佢對細人仔目瞞目杌。有人講：「阿爸，係男人最溫柔个名仔。」這句話印證到佢爸个身上，一滴就毋會爭差。

作者：張美容

☆詞彙學習☆

【目汁漕流】mug zhib choˊ liu：眼淚流不停的樣子。

【目珠眶】mug zhuˋ kiongˋ：眼眶。

【哀奶】oiˋ noiˋ：安撫。

【目勾勾仔】mug gieuˋ gieuˋ er：望眼欲穿的樣子。

【起榼】hiˋ kuag：開頭。

【嘴丫角】zhoiˋ aˋ gog：嘴角。

【操耳空】cauˋ ngiˋ kungˋ：挖耳朵。

【目瞞目杌】mug him mug zhimˋ：瞪眼怒視。

☆文法學習☆

【冷到奈毋得】langˋ doˋ naiˋ m ded：冷得不得了。「V_{動詞} + 到奈毋得」，表示動作的程度、結果到極致。

例1：佢考第一名，暢到奈毋得。（他考第一名，高興得不得了。）

例2：佢兩餐無食，枵到奈毋得。（他兩餐沒吃，餓得不得了。）